
COMUNICÂT STAMPE

Il president de Arlef al ricuarde il deputât furlan mancjât ai 21 di Lui dal 2012

IN MEMORIE DAL ON. ARNALDO BARACETTI

Lorenzo Zanon al comente la resinte sentence de cort costituzionâl “Ce che al è stât otignût al è un coronament dal so grant lavôr”.

Udin, ai 22 di Lui dal 2013 – La resinte sentence de Cort Costituzionâl intervignude su la spending review – ritignude discriminatorie tai confronts de minorance linguistiche furlane – e ufrîs la ocasion par ricuardâ l'on. Arnaldo Baracetti a un an de sô muart (al è mancjât ai 21 di Lui dal 2012).

Di fat fundamentâl al fo il lavôr dal on. Baracetti che si batè pe aprovazion de leç pe valorizazion de lenghe furlane. Al fo deputât dal Partît comunist talian dal 1976 al 1987. Dopo dal taramot dal 1976 al fo stabilît par leç, in grazie di un so emendament, che la Universitât dal Friûl e ves tant che «obietîf di contribuî al progrès civîl, sociâl e a la rinassite economiche dal Friûl e di diventâ organic strument di disvilup e di rinovament dai filons originâi de culture, de lenghe, des tradizions e de storie dal Friûl». Tal 1978 al presentà la propueste di leç “Normis pe valorizazion de lenghe e de culture furlane”, un at che il parlament al concretizà dopo passe 20 agns, cuant che e fo aprovade la leç 482/1999.

“Il so impegn e la sô costance a àn dât un contribuît prezios a servizi dal Friûl e de lenghe furlane e par chest al è un at dovût ricuardâ l'on. Baracetti” al à comentât Lorenzo Zanon, president de Agenzie regionâl pe lenghe furlane. “Fundamentâl e je stade ancje la sô ativitât simpri salde par domandâ i programs in lenghe furlane te RAI e par garantî l'insegnament de marilenghe tes scuelis. Ce che al è stât otignût al è un coronament dal so grant lavôr”.